

隨

園

隨

筆

隨園隨筆卷二十五

錢塘袁枚子才

詩文著述類下

考据最難

趙岐註孟悞曹交爲曹君之弟不知左氏哀公八年曹已滅矣戰國時焉得有君章懷太子註後漢書悞元二爲元元不知乃建初之元年二年也楊彪碑云中遭元二西戎寇殘洪慶善註九歌絙瑟兮交鼓簫鐘兮瑤簋以爲簫鐘二器乃樂聲之相應者一蜀士曰簫卽擴廣韵云擊也楚詞以擊鐘對絙瑟耳非器名也蔡謨悞以計然爲范蠡所著書名不知漢書古今人表列計然第

四等皇覽載然爲濮上人姓辛字文子其志沈沈不肯  
自顯故稱曰計然馬總意林亦載之酈道元水經注悞  
以中平二年都鄉正街彈碑爲衛彈碑不知周禮里宰  
註合耦于緡若今街彈之室于此合耦使相佐助也阮  
籍詠懷詩趙李相經過顏延年註以爲李夫人趙飛燕  
不知趙季李欸乃成帝時陽翟大使也見漢書蓋讀葛  
等傳韓文公孔子廟記社稷之不屋而壇豈如孔子獨  
坐巍然禮壇屋不分隆殺古廟供主非像安得云獨坐  
耶王伯厚困學紀聞悞陸希聲爲陸質不知一侍讀宗  
一相昭宗悞盤谷李愿爲西平王之子不知西平王之  
子愿非隱者爲校檢司空河中節度使見裴晉公所撰

神道碑唐別有李愿隱居盤谷又悞嚴延年女羅紉爲昌邑王妻不知妻昌邑者乃執金吾嚴延年非御史嚴延年一字長孫一字次卿見百官公卿表李善注西京賦以屬玉之館爲玉飾不知屬玉水鳥名也漢栢梁灾故多以水鳥名觀見西京雜記黃魯直詩月黑虎夔藩用少陵課伐木詩序有虎知禁必昏黑控突夔人屋壁夔者夔州人也魯直以夔字當窺字解爲益公題跋所設東坡南安軍學記有弟子揚解而序點者三此用禮記孔子射于矍相語也將序點作虛字用意忘點是入名爲容齋五筆所譏緯蕭蟹斷也二字出莊子陶九成作輟耕錄不知二字所出湘素雜記忘麥秋出月令孟

夏之月靡草死麥秋至而乃引北史蘇綽傳爲解能改  
齋漫錄忘首如飛蓬見于毛詩而乃引左思賦爲解又  
忘樹桃李者夏得休息見說苑而乃以爲狄梁公事趙  
凡夫說文長箋譏懷素改極爲笈不知負笈二字見李  
邵傳以翻胃釋病不知痕痛二字見薛宣傳劉貢父不  
解爆梨之義高似孫緯畧以爲爆牛最勇故刻之于梨  
李綽輦下記曰爆梨者取爾雅爆牛抵觸百獸之象仗  
內有爆稍庫刻爆牛形于其上宋八稍安朝堂行禮前  
導其夾大將軍者名衛司爆稍也宋王禹偁作月波樓  
詩自注不知月波出處按漢樂府月穆穆以金波韓文  
公詩微風吹空月舒波已用之矣謝朓贈王融詩貼危

賴宗哀指謝安也李周翰注以爲王導并云與謝元同  
破苻堅則年代隔遠矣鹽鐵論文學曰臧文仲治魯勝  
盜而自矜子貢曰民將欺而況民盜乎子貢與文仲亦  
年代隔遠矣爾雅山有穴爲岫謝元暉詩廳中列遠岫  
徐浩文孤岫龜形皆悞指爲山巒漢孫叔敖碑君有曾  
閔之行又曰繼伍舉子文之統叔敖與曾閔伍舉亦相  
隔年代遠矣史記悞以楚優孟爲在淳于髡後陶宏景  
真誥悞以鄭子真爲康成之孫班固古今人表悞以范  
武子與士會爲二人韓非子謂叔向譖萇宏咎犯諫晉  
平公皆可笑也

葛常之韵語陽秋悞以曹弗興爲曹霸爲方密之所譏

見通雅顧寧人誤以衛玠衛瓘爲兄弟爲閻百詩所譏  
見潛邱札記楊升菴誤以王筠爲王融以南朝劉休妻  
賈皂英爲北齊事爲胡應麟所譏見胡氏筆叢汪鈍翁  
爲人作墓志云爵至太傅不知太傅非爵也官也爵者  
公侯伯子男也亦爲百詩所譏

高似孫緯畧引金樓子云劉子元爲水仙花賦不減洛  
神按劉子元卽劉知幾唐人也金樓子乃梁元帝所作  
年代隔遠矣考御覽引金樓子云劉休元爲水仙賦云  
云休元者南平王繇也劉宋時人水仙非花卽洛神也  
顧寧人駁漢書段熲爲叔段之後言古無以祖名爲姓  
者不知鄭樵通志載以祖名爲姓者乃有二百餘人唐

類函陳遵與宣帝博奕數召進及卽位遵太原太守  
曰可以償博進矣按漢書乃是陳遂字長子遵之祖非  
遵也

鸞鳥聞樂而舞

王應麟曰虞書鳳凰來儀之說人多疑之按東觀記王  
阜爲重泉令鸞集學宮阜擊磬鸞舞不止此其証矣

青詞

朱薦告官廟之文用青藤紙寫朱字號曰青詞

今書缺畧

逸詩逸論語逸莊子世之好事者集有成書矣余于此  
外又偶集今書之缺如續漢書郡國志引趙絕書曰蕭



山西子之所出今越絕書無之士相見禮賈疏引論語  
鄉黨云孔子與君圖事于庭圖政于堂今之論語無之  
法言酒誥之篇俄空焉今之酒誥蓋揚雄所未見也劉  
向七錄王制有本制兵制服制諸篇而今之王制無之  
說文引爾雅欄欄積積今爾雅無之史記索隱引國策  
豫讓斬襄子衣出血襄子回輪而亡御覽引國策吳王  
問孫武曰敵人保山據險挑之不出奈何武曰分兵守  
要謹脩不懈潛探其情密候其怠久無所得自然變改  
今國策無之杜預曰竹書七十五篇外有一卷曰師春  
全集卜筮語今師春篇乃紀諸國世次無卜筮語康成  
箋家土曰春秋傳蜃宜社之內今三傳皆無此語御覽

引古文瑣語云幽王欲殺太子宜臼使虎食之宜臼叱  
之虎帖耳服今周書無之御覽引博物志云季子敖身  
長七寸遊鵠嗑中秦胡乞身長數丈一步渡河與齊魯  
戰折板傷齒今博物志無之寰宇記引春秋繁露曰三  
皇驅車出谷口通典亦引其語曰劍之在左蒼龍之象  
也刀之在右白虎之象也冠之在首元武之象也韍之  
在前朱雀之象也今本無之顏師古註武帝紀引淮南  
子禹治水通轅轅山化爲熊謂塗山氏曰欲餉問鼓聲  
乃來禹跳石誤中鼓塗山氏往見禹方作熊慚而去至  
嵩高山化爲石禹呼還我子石破北方而啟生今淮南  
子無之南朝劉之遴得古本漢書有中篇無敘傳外戚

傳在帝紀下不在西域傳後韓信贊曰淮陰毅毅仗劍  
周章今漢書無之文獻通考宋張齊賢議曰尚書盤庚  
有商及王史記云陽甲至小乙兄弟四人相承故不稱  
嗣子而曰及王明不繼兄之統也御覽引史記樂書曰  
漢祠太乙以昏時祠到明今民間夜游觀燈是其遺事  
今史記無此文左傳正義引白虎通云王者諸侯所以  
田獵者上以供宗廟下以集士衆也春謂之田何舉木  
名而言之也夏謂之苗何擇其懷任者也秋謂之蒐何  
索肥者也冬謂之狩何守地而取之也今白虎通無此  
數言白虎通又引禮運曰六經者所以扶成五性也今  
之禮運無之御覽引莊子云孔子病子貢出下子目夷

待也吾居處若齋食飲若祭吾卜之久矣今之莊子無  
之逸篇亦無之說苑貴德篇引禮記曰上牲損則用下  
牲下牲損則祭不脩物今四十九篇中無之文選註引  
墨子曰二三子復于墨子曰告子勝仁墨子曰告子爲  
仁猶跂以爲長偃以爲廣不可久也今之墨子無之皇  
甫謚引孟子稱禹生石紐法言引孟子夫有意而不至  
者有矣未有不意而至者也梁武帝答臣下神滅論引  
孟子人之所知不如人之所不知蕭子良與孔中丞書  
引孟子君王母好智母好勇勇智之過禍患所生今之  
孟子無之

古文摹倣

古人作文摹倣痕迹未化雖韓柳不免退之送窮文倣  
揚雄逐貧賦毛穎傳以管城封公倣南朝騷九錫文以  
驢封大蘭王諱辨父名仁子不得爲人倣北齊顏之推  
云桓公名白傳有五皓之稱厲王名長琴有修短之目  
不聞改布帛爲布帛改腎腸爲腎修也祭十二郎文汝  
病吾不知時汝死吾不知日用宇文護與母書我寒不  
得汝衣我饑不得汝食也送齊婢下第序能知命者也  
能不惑者也用荀子非十二子篇羞獨富者也遠罪過  
者也與崔立之書與曹子建與楊德祖書意境相似柳  
子厚作記與漢馬第伯封禪儀記句調相似爲太夫人  
作耐志已矣窮天下之聲無以舒其哀矣盡天下之詞

無以傳其酷矣連用矣字倣禮記問喪篇亡矣喪矣不可復見已矣哭泣辟踊盡哀而止矣毀象祠記苟離于正雖千載之遠吾得而更之況今茲乎用董仲舒高廟災對苟違于禮雖尊如高廟吾猶災之況其他乎賀進士王參元失火書倣說苑公子成父賀魏文侯御廩災兼倣叔向賀范宣子憂貧也河間婦人傳先貞後亂倣游俠傳原涉曰寡婦一朝被污從此放縱荒淫也游黃溪記其間名山水而州者以百數永最善名山水而村者以百數黃溪最善倣漢書西南夷傳其西靡莫之屬以十數滇最大自滇以北君長以十數邛都最大李習之高懸女碑天下爲父母者莫不欲懸女之爲其子也

爲夫者莫不欲愍女之爲其室家也。倣國策陳軫曰：孝已愛其親，天下欲以爲子；胥忠于君，天下欲以爲臣。祖君彥檄揚帝文，罄南山之竹書罪，無窮決東海之波流惡難盡。倣漢書公孫賀傳：朱安世云：南山之竹不足受我詞，斜谷之木不足爲我械。獨孤及仙掌銘：日而月之星而辰之。倣莊子：庚桑柔楚篇：社而稷之尸而祝之。王右軍蘭亭序後之視，今亦猶今之視。昔月京房傳語：臣恐後之視，今猶今之視前也。曹子建求自試表：慈父不能愛無益之子，仁君不能畜無用之臣。全用墨子語也。羊祜讓開府表：德未爲人服而受高爵，則才臣不繼也。全用管子語也。相如大人賦：全用屈平遠遊篇。崔駰達

旨全用子雲解嘲杜牧阿房宮賦起句三字用韻六玉  
畢蜀山不攸陸修長城賦千城絕長城列也後連用也  
字開粧鏡也棄脂水也用邊孝先博塞賦分陰陽也象  
日月也皇甫湜答李生第一書虎豹之文不得不炳于  
大羊鸞鳳之音不得不鏘于鳥鵲非有意先之乃自然  
也用三國志秦宓曰虎生而文炳鳳生而五色豈以自  
飾哉天性自然也孫樵諫復羣髦疏夫以十家給一髦  
是編民百七十萬困于羣髦也用貢禹封事以上農計  
之是七十萬人受其饑也邱遲與陳伯之書見故國之  
旗鼓感平生于疇昔用臧洪與袁紹書見主人之旗鼓  
感故友之周旋歐公醉翁亭記連用也字倣周易雜卦



傳篇倣孫武子又倣昌黎之銘張徹也安重誨傳先立  
四柱而下分應之倣國策蘇子謂薛公一段老泉禾假  
山記二峯者雖其勢服于中峯而無阿附意倣楊敬之  
華山賦似乎賢人守位北面而受成也劉禹錫許州文  
宣王碑銘學退之平淮西碑新唐書之李懷仙傳杜牧  
之譚忠傳全學國策劉伯溫賣柑者說全倣柳子鞭賈  
一篇歐公豐樂亭記仰而觀山俯而聽泉用白香山廬  
山草堂記仰觀山俯聽泉漢宋訓詁雖本爾雅亦全學  
國語叔向解風夜基命宥密之詩曰風夜恭也基始也  
又學左氏參和爲仁德正應和曰莫也宋書沈慶之出  
遊騎馬以馬與影爲三人李白襲之曰舉杯邀明月對

成三人賈島曰但愛杉倚月我倚杉爲三是又裴太  
白矣老泉仲兄文甫字說風行水上渙天下之至文也  
本代檀詩毛氏傳云風行水成文曰漣張文潛又襲之  
以爲文論東坡鍾子翼哀詞四言間七言學荀子成相  
篇韓文春與猿吟兮秋鶴與飛學論語迅雷風烈又學  
楚詞吉日兮辰良劉夢得嘆牛云員能霸吳屬饒賜斯  
旣帝秦五刑具倣漢書刪通傳贊豎牛奔仲叔孫卒卹  
伯毀季昭公逐也漢書朱買臣榮歸會稽一段全倣須  
賈見范睢退之南山詩多用或字倣小雅或燕燕居息  
等句唐楊妃謠生男勿喜女勿悲今看生女作門楣倣  
漢衛子夫歌云生男無喜女無怒獨不見衛子夫霸天

下三國志諸葛恪傳先序災咎後序禍患倣漢書霍光傳霍禹族誅先見凶異也王勃滕王閣序落霞與孤鶩齊飛秋水共長天一色本庾信三月三日華林園馬射賦落花與芝蓋齊飛楊柳共春旗一色駱賓王爲徐敬業討武曌檄云暗鳴則山岳崩頽叱咤則風雲變色以此制敵何敵不摧以此圖功何功不克本祖君彥爲李密討楊帝檄云呼吸則河渭絕流叱咤則嵩華自拔以此攻城何城不陷以此擊陣何陣不摧三國志許褚與韋張遼俱仿史記昌黎淮西碑仿舜典畫記仿顧命諫仲骨表仿無逸日知錄亦有古文摹倣一篇與此不同彼言摹倣體裁局段此言摹倣句調詞語二者互相參

明至古人另有擬體如陸機劉焯各有擬古詩張載擬  
四愁詩謝靈運擬太子郭中集詩李白擬恨賦皆全篇  
規倣是又不可不知

古人合集一堂各司一事

古人有合集一堂各司一事者常戲集之世說陳太邱  
詣荀朗陵家使元方將車季方持杖長文尙少載著車  
中荀使叔慈應門慈明行酒六龍下食文若尙小抱坐  
膝上說苑趙太子疾扁鵲過之造軒光之竈八成之湯  
子容禱藥子明吹耳陽儀反神子越扶形後漢書光武  
至南陽遇雨馮異抱薪鄧禹夔火光武燎衣南史王敬  
則請高祖幸東官長沙王晃捉華蓋臨川王映執雉尾

扇聞喜公子良持酒鎗南郡王銳行酒豫章王疑捧肴  
晉書孝武講孝經僕射謝安侍坐尙書陸納侍講侍中  
卞耽執牘吏部郎袁宏執經車胤與丹陽尹王混摘句  
南齊書高帝曲宴褚淵彈琵琶王僧虔柳世隆彈琴沈  
文季歌子夜來張敬兒舞王敬則拍張王儉跪上前誦  
封禪書唐詩紀事中宗賜宴張錫爲談客娘舞宗晉卿  
舞渾脫張洽舞黃獐杜元琰誦婆羅門呪盧藏用效道  
士上章惟園子監司業蘇瓌誦鹿鳴蟋蟀兩詩西京雜  
記梁孝王遊忘憂館使諸客分題作賦枚乘得柳鄒陽  
得酒公孫詭得文鹿韓安國得几羊勝得屏風漢武內  
傳王母升武帝殿命王子登彈八琅之璈董雙成吹雲

和之笙石公子擊昆庭之金匏靈幸拊五靈之石范成  
君敲湘陰之磬段安香作九天之銘法嬰歌元靈之曲  
武夷古記武夷君八月十五日會鄉人于幔亭張安陸  
打鼓鮑公希吹笛何鳳兒拍板董嬌嬌彈箏篴彭令昭  
唱人間可哀之曲

東方朔中下之資

東方朔上書自夸年十二學書三冬文史足用至年二  
十二共誦四十四萬言爲之按日分算每年只得七萬  
三千三百言每日只得二百零三言是中人稍下之資  
也

唐藝文志經史分類

唐藝文志經有十一類史有十二類九經外加說緯小學經解爲十一史分正雜編年起居注故事職官傳記  
錢注膳牒地理爲十

古書僞托

古書僞托撰人姓名有無端而發露其僞者中庸漢儒所纂而相傳爲子思所作按孔子孟子皆山東人故每言山必稱泰山曰曾謂泰山曰泰山其頽曰挾泰山以超北海曰登泰山而小天下皆言山東最尊之山就近指點也中庸一言山卽曰載華嶽而不重明明是長安之人說長安之華山漢都長安故也因而類推之山海經相傳禹作也乃有零陵長沙是漢時地名爾雅相傳

周公作也乃有張仲孝友友是宜王時人水經漢桑欽  
著也乃有江水東經永安宮之語永安宮昭烈托孤處  
也桑欽見西漢儒林傳相隔二百餘年易林焦延壽著  
也有昭君是福等語延壽是宣帝時人昭君是元帝時  
人星經甘石著也有羽林郎將等名甘石是周以前人  
羽林郎將乃秦漢官名列仙傳劉向作也贊云七十四  
人已見佛經蒼頡篇李斯書也中有漢兼天下猶鯨鯢  
覆等語元命苞春秋書也有公輸魯班等名皆戰國時  
人張平子深駁其僞漢惠帝名盈蘇李河梁詩獨有盈  
觴酒不避盈字俱可疑本草神農書也中有豫章朱崖  
趙國常山奉高真定臨淄馮翊出諸藥味郡名汲冢周



書周月解以日月俱起于牽牛之初按堯時日躔虛一  
度至漢太初厯始云日起牽牛一度何周月乃爾又時  
訓解以雨水爲正月中氣考自太初以前厯皆以驚蟄  
爲正月中氣至太初厯始易之以雨水何時訓而云然  
耶管子稱三晉之君其時無三晉國語勾踐之伯陳蔡  
服從其時有蔡無陳呂氏春秋晉文公師隨會韓詩外  
傳孟嘗君學于閔子年代不誣皆可笑也

詩平仄隨意

杜詩側聽中興主長吟不世賢中字作平聲用也百年  
垂死中興時忽作仄聲用矣到此應常宿相留各判年  
判字作仄聲用也先判一飲醉如泥忽又作平聲用矣

他如刺史諸侯貴郎官列宿應爲問彭州牧何時救急  
難應字均應仄用而皆強以平押之元微之遣春詩寒  
韵中用聲名老更判憶開元舊事刪韵中用安能懼謗  
訕送侍御之嶺南咸韵中用洞炤失明鑒皆以仄押平  
詩不拘隻偶

李德裕言詩不拘隻偶文選有五韵者七韵者子建七  
言有回泥諧旅四韵王粲五言有攀原安三韵

### 不轉韵詩

顧寧人言詩不轉韵則板滯不靈三百篇無三四句不  
轉韵者後人詩一韵到底者始于韓而終于蘇然文心  
雕龍曰賈誼枚乘兩韵輒易劉歆桓譚百句不遷亦各

從其志也則不轉約由來久矣

代倩

曹操疑子建文章有倩人者故面試之唐書溫飛卿憤  
哲人代倩文字故臨試之時有司廉視甚謹溫不樂上  
書千言然代倩者已八人矣

古書衍文

莊子舜真冷禹曰通雅以真冷爲遺命之訛漢武帝紀  
曰內長文所以廣愛也劉貢父以內長文爲而肆赦之  
說史趙奢傳奢救魏之邯鄲司馬貞以邯鄲爲欲戰之  
說此皆以意揣而得之者也他若盤庚之弔由靈論諸  
之文莫巾舞歌之來何嬰國語之瑕豫吾吾伯牙操之

欽傷宮古樂府之收中吾羊無夷何何吾吾皆不知  
所解

### 字書所

吳越春秋吳太子友諫曰黃雀徘徊回跖蹙微進蹖蹙二  
字字書所無淮南子突生海人突字字書無之金史有  
乂人部落乂字字書亦無之風俗通徐釋往弔黃瓊齋  
筠并涉齋一盤并筠二字字書所無光武紀更始從臣  
諸于繡駟王景傳景用塢流法駟字馮字皆字書所無  
唐文粹羅隱說石烈士推倒韓碑傾彫者三彫字今字  
書無之

### 古書所載不同

世傳老萊子綵衣娛親曹子建靈芝篇伯瑜年七十綵  
衣娛其親非老萊也世傳欒巴噀酒水救火而後漢書  
方術傳噀酒救火者樊英郭憲橫非欒巴也世傳姜太  
公八十遇文王而宋玉賦曰太公九十乃顯榮今東方  
朔曰太公七十二乃用于文武非八十也世傳蔡雍識  
焦尾琴止主人之爨而傳元琴賦引以爲是司馬相如  
事非蔡邕也王勃序徐孺下陳蕃之榻漢書陳蕃爲之  
設榻者乃周璆也子安所用本袁宏漢紀其他兩書互  
異者如孟子子濯孺子曰庾公之斯學射于尹公之他  
尹公之他學射于我左氏尹公佗學射于庾公差庾公  
差學射于公孫丁對武后雙陸不勝之夢新書以爲狄

梁公事大唐說纂以爲王方慶事吳入郢而戰死者左  
氏以爲左司馬戍淮南以爲莫敖大心以乘輿濟人者  
孟子以爲子產說苑以爲景差識鼯鼠者爾雅疏以爲  
終軍文選註以爲竇攸後漢書范巨卿與張邵爲死友  
鄭道元水經註張邵與陳平子爲死友非巨卿也晉書  
孝武帝每賜侍臣文詔詞不雅者謝邈焚毀之通鑑孝  
武帝好爲手詔賜人文詞率爾徐迴應時收改非謝邈  
也呂氏春秋子培所射者隋兕說苑以爲科雉左氏哭  
秦庭請救楚者申包胥國策以爲夢旨勃蘇近寶公室  
乃貧左傳韓厥語也鄭道元水經注以爲魏絳語柳宗  
元文中遵水經注公羊以申生爲雉經死說苑以爲伏

劍死償償表者韓非子以爲吳起秦紀以爲商鞅問舜  
冠而不對者尙書大傳以爲成王問周公家語以爲哀  
公問孔子喻稱有鳥三年不飛不鳴者楚世家以爲伍  
舉新序以爲士慶呂覽以爲成公賈壺關三老之姓名  
漢武故事以爲鄒茂荀悅漢紀記以爲令狐茂杯中蛇  
影世說以爲樂廣事風俗通以爲主簿杜宣事蒼蠅傳  
故事異苑以爲晉明帝載記以爲荀堅弒子般者左氏  
以爲閹人羊公羊以爲鄧扈樂射石者韓非子以爲熊  
渠史記以爲李廣識勞薪者說苑以爲師曠世說以爲  
荀勗戮亂行者左氏以爲魏絳國語以爲韓厥蔡聲子  
勸楚子木所返遠臣國語以爲湫舉左氏以爲伍舉又

作叙舉國語載聶子所舉楚才晉用四五人乃盡與左氏不合矣史記周公死方發金滕與尚書不合介之推因舅犯要君而隱與左氏不合

古用虛字不可解

古人用而字有不可解者尚書曰其能而亂四方以敬忌天威國策曰道而聞之左氏曰衆而后定子庚曰若可君而繼之此而字卽然字猶可解也他如左氏闕伯比曰司馬則然莊子是其所以乃又曰汝以罔聽之奚祭義之語焉而未之然哀公問之寡人願有言然祭義之國人稱願然曰有子如此公羊之然而宮中甲鼓而起然而甲起于琴如此數然字殊不倫又難經以然字



當曰字亦奇考工記代之受病左氏斬之蓬蒿藜藿子  
文以爲之功苟罄曰寡君之以爲戮楚世家曰人之攻  
之必萬之于虎此數之字亦不倫

經史語多不拘

王藻曰大夫不得造車馬車可造馬不可造也周易不  
耕穫不菑畲耕時不能穫也潤之以風雨風可潤乎漢  
書于定國食酒一石酒可食乎朱買臣呼飯飲之飯可  
飲乎其用字法皆不甚拘也谷永曰一下當盛漢之隆  
班氏曰高帝行寬仁之厚尙書曷其奈何不改八口不  
遑暇食詩經曰旣庶且多越語范蠡曰妨于國家靡王  
躬身陳壽曰躬履清蹈古樂府暮不夜歸邯鄲淳碑云

立墓起墳相如之懷而慕思皆複語也古之人不以爲嫌而惟壽見譏于裴松之

### 古文省字

古人文多省字法如左氏使之年者使之言年也楚國第者楚國爲政以次第也則如勿傷者不如勿傷之也公羊不能乎母言不能事母也魯語宋人夏父展曰君作而順則故之言以爲故事也臧宣叔曰齊楚同我也言齊楚同伐我也晉語張老曰士首之謂斲其首也左氏吳子門于巢公羊無人門焉者皆倣此矣東漢郅惲曰子在吾憂而不手倣植弓子手弓而可皆省却一字

### 古文增字

古文又有增字者稱公劉曰篤公劉坎卦曰習坎越曰  
於越吳曰勾吳高麗曰高句麗

隨園隨筆卷二十六

錢塘袁枚子才

古姓名類

姓名之奇

漢書丙吉傳有守丞名誰如與左傳叔孫成子名不敢相似貨殖傳有姓偉姓姓也偉名也儒林傳有丁姓子孫從榮廣受春秋丁姓也姓名也穀梁隱九年俠卒俠者所俠也前漢有所忠後漢有所輔宋掌禹錫姓掌家鉉翁姓家漢文後元五年以中大夫令免爲車騎將軍姓令名免漢書萬章傳有箭張回爲王尊所殺世無姓箭者故服虔以爲作箭人國語太宰以祝史帥狸姓韋

註以狸姓爲丹朱之後趙簡子問于壯馳茲是姓壯也  
趙襄子曰莧諱犯我以義是姓莧也穆天子傳盛姬姓  
痛鄭樵氏族略有姓死者尤奇有名二字而字一者鄭當  
時字莊有成景雋字超有名一字一者屈原名平項羽  
名籍有以名爲字者郭子儀字子儀又有以三字爲字  
者孟子父名激公宜晉屈無爲字無不爲張天錫字  
純叡宋劉敞字伯貢父劉敞字中原父又有以四字爲  
字者左傳楚有耿之不比齊有石之紛如戰國有董之  
繁菁詩經有程伯休父名之最可笑者北齊有顏惡頭  
南唐有馮見鬼金史忠義傳有郭蝦蟆元史有石抹狗  
狗郭狗狗遼皇族西郡王名驢糞金宣宗時濮王傳名

猶冀炎帝臣有怪義唐人獻裴度策禽吳元濟者有怕  
善姓怪姓怕俱奇有姓銀者正德時有雞澤令銀鎮三  
國志魏有牽招是姓牽也又有中郎將射援是姓射也  
郭嘉傳有戲志是姓戲也何氏姓苑云昔岱縣人姓九  
百名里爲邑小吏而功曹姓萬邑中語曰九百小吏萬  
功曹是古有九百氏也唐高宗萬年宮碑碑陰題名有  
太僕卿上柱國張天師

三昭君兩孔明兩元德兩四皓

漢有兩昭君一王嬙一王莽傳涿郡昭君方士也高歡  
妻后亦小字昭君三國有兩孔明兩元德一孔明諸葛  
也一管寧傳魏人胡昭字孔明潁川人也一元德先主

字也一法正祖父眞字高卿亦號元德先生漢四皓是東園夏黃公等南朝有四皓徐伯珍兄弟也

魏有郭汾陽

魏志郭淮傳淮字伯濟封汾陽子是三國時先有郭汾陽

萬石君有三

號萬石君者石奮外馮勤嚴延年秦襲家皆有五二千石唐張文瓘亦號萬石張家

宋有唐伯虎

宋史文苑傳唐庚之兄初名贍後名伯虎性孝常夢父遠出書速來二字急往焉而父果病

紂字受德

汲冢周書克殷解第三十六尹逸莢曰殷末孫受德迷先成湯之明孔晁注曰受德紂字也

杜度似誤而竟實有其人

焦竑曰杜操字伯度遼魏武諱故以字名昌黎誤用杜度不知晉衛恒傳言漢章帝時有齊相杜度工草書非昌黎之悞

瞽瞍名機

孫海門稽古名異錄瞽瞍一作瞽機人但知其頑而不知能作十二絃之瑟出呂氏春秋免文王于羑里者人但知散宜生而不知有陰競漢賦又有吉祥釋聖于羑



里之語皆不知何所本

重堯舜文王孔子之名

晉書有顏回爲堯帥光武本紀有城頭子路通鑑有秦征西將軍孔子帥兵五千討吐谷渾唐貞觀時新羅國有宰相名文王梁史有虞舜官太常丞建明堂之儀漢有唐堯爲臨武長誤本刻堯字遂有堯舜文王孔子顏回與人同名之疏又何況竇融之字周公袁安之字召公乎他則十一王褒劉宏九張良八張敞王吉三李密張萬福指不勝屈宜乎蕭繹陸善終之作同姓名錄也隋書梁士彥子名操字玄

孔子名耶益子字子居

孔子名耶以頂上預故也孟子字子與以名軻故也乃  
周密癸辛雜志云孔子初名兵後乃去下八字不知所  
本何書宋禮部韻略引廣韻稱孟子生而居坎軻之地  
故名軻字子居顏師古註急就章亦有孟子名軻字子  
居之說不知所本何書洞神經曰天皇姓望名獲地皇  
姓鑑名嶽

### 西漢人字多相同

西漢人字多雷同汲黯韋賢韓安國三人俱字長孺雋  
不疑東方朔二人均字曼倩司馬相如薛廣德夏侯建  
施讎孟喜均字長卿蓋寬饒黃霸二人均字次公孔光  
杜欽二人均字子夏王商翟方進二人均字子威其他

猶多未暇枚舉

文翁仲雍伯夷之父

張崇文歷代小史文翁姓文名黨字仲翁仲雍字孰哉  
見司馬索隱所引世說伯夷父名初字子期見春秋少

義

文君前夫

卓文君前夫程鄭子名臯亦以消渴卒見曹宗璠文君  
傳

東海孝婦

東海孝婦姓周名青見搜神記

六公孫宏

戰國有兩公孫宏一在齊爲孟嘗君見秦昭王一在山言司馬熹招大國之威求相與漢平津侯爲三人韓子云公孫宏斷髮而爲越王騎是四人矣又東漢司徒虞延與楚王英黨公孫宏等交通皆自殺見天文志晉惠帝時楚王瑋旣誅長史公孫宏舍人岐盛並夷三族見王渾傳是有六公孫宏也唐有兩李益兩韓翃

### 公輸若般有三

榴弓季康子母死公輸若幼般請以機封史記引公輸之攻墨子之守似輸般爲二人古樂府公輸與魯般亦其証也山海經般作弓矢又似三人李善注七啟班輸無所措斧斤曰公輸若匠師般若之族也又似一人猶

之王良伯樂郵無卹人物表以爲三人他書以爲一人  
馮夷有二

馮夷有二莊子馮夷得之以游大川水神也淮南子馮  
夷太丙之御天神也

蹇修伏羲臣

離騷注蹇修伏羲臣不知何據按黃帝始制嫁娶伏羲  
時已有媒氏乎

古人姓名之別見者

皇甫謐帝王世紀專替古人僞造姓名方密之通雅所  
載隱僻者甚多今于世紀通雅之外採而錄之蒼頡姓  
溪剛氏見逸史論語吾黨有直躬者乃石奢也見詩詩

外傳老子名乾字元杲見前京錄箕子名胥餘見司馬  
彪莊子註比干亦名胥餘見尸子羣收名諺勾芒名重  
見月令鄭註文種字子禽見吳越春秋外黃小兒說項  
羽者姓仇名叔爲外黃令仇明之子見太平清話陳仲  
子字子終見皇甫謐高士傳薛濤字度宏見研北雜志  
楊王孫名貴見西京雜記公冶長名芝字子長見范甯  
釋文臣瓚著史記者劉孝標以爲于瓚索隱以爲傳瓚  
裴駰以爲莫知姓名東坡遊赤壁有吹洞簫者爲道士  
楊世昌嚴道甫云曾見東坡畫猫有羽客楊世昌跋其  
印爲子正二字相卽道士之字見高似孫緯略馮子都  
名殷見晉灼註伯堅字子輿見左傳桃源問津漁人姓

黃名道真見仙傳拾遺許由字仲武見莊子釋文叔孫  
通名何見楚漢春秋項伯名鯁見漢書注易牙名雍巫  
見孔疏并載宋人王慤野客叢書

物而人名

周禮注鰾魚字大戴禮蘭氏之根是魚有字蘭稱氏也  
因推而廣之穆天子傳狗名重工徐廣封禪書狸名不  
來星而人名者王蓬芮王良傳說奚仲箕爲教客草木  
而地名者艾號永臺草名大邯鄲小邯鄲木名豫章馬  
而鳥魚名者國策韓盧采鵲魯頌有驛有魚器而人名  
者考工記轉人爲臯陶弓受弦處名朱及三見儀禮謂  
以朱莖韜三指而利故弦也石而人名者翁仲草木而

人名者畦草名寡婦箴平仲君遷長卿簡子藥而人名者管仲杜仲使君子劍而疾名者疥癆賓禽獸草木器物而以虛字名者王會解之每牛雖馬詩註疏之夫不流離陸璣草木蟲魚疏之果然吉了善哉翟所蝗螂名不過盛名常不肯俱奇大簫曰言大瑟曰離大鼓曰田吳語舟名須慮蟲而人名者蚊稱黍民薊稱杜伯蜴稱主簿蟲蜺名縊女螢名丹良鳥而飲食名者黃鶯名博黍烏名婆餅焦絲而金名者琴名號鐘草而鳥名者芋名蹲鴟刀而人名者孟勞鳥而人名者信天翁金衣公子樗雞號紅娘子金而蟲名者錢號青蚨屋而獸名者屋角曰陽馬地而蟲名者胸臆蟲而獸名者元駒甬虎



常羊渠獵草而蟲名者游龍木而馬名者騶有六駸鳥  
蟲而器名者鶴名負金蠅名醜扇科蚪名元針車渠名  
海扇巨蝸名郎巾蟲而禽名者莎雞爲蒲錯其他鏡之  
爲容城侯蜥之爲與國公菊之爲傳延年絃上琵琶草  
間解艇則又是後人增加矣舟而地名者孫權舡號長  
安

遼金元姓氏頗合于古

三代上無一定之姓氏如孔子之孔因宰孔也孟子之  
孟因孟孫也按遼史后妃傳云太祖慕漢高祖故耶律  
儼稱劉氏以乙室拔里氏比蕭何遂爲蕭氏金史宗室  
表完顏十二部其後皆以部爲氏稱完顏者有二有同

姓完顏疎族也有異姓完顏部落也元馬祖常之高祖  
錫里吉思爲金鳳翔兵馬判官遂以馬爲氏布海魯牙  
拜廉使日子子遂姓廉名希憲小雲石海涯之父曰貫  
只哥遂以貫爲氏號貫酸齋此與魯之東門宋之桐門  
及司馬司空之姓氏何異

生而自言其名

高辛帝生而自言其名曰岌見史記一作姦又一生六  
子曰祝融見帝繫

隨園隨筆卷二十七

錢塘袁枚子才

雜記類

舜有兄

越絕書舜兄狂弟傲尸子舜事親養兄爲天下法是舜有兄也惜妹名穀首而兄名無考夏禮谷爲湖北學政試秀才象日以殺舜爲事題一生文云象不特殺之于水于火而且殺之于酒也閱卷者譁然以爲妄夏公曰勿怪慮有出處且觀對比若何其對云舜雖不得于其父其母而幸得于其妹也衆始知爲積學矣按祖君彥檄煬帝文有不圖穀首之賢反蒙齊襄之恥然則舜殺

于酒必有典故不可抹也後觀釋史方知出列女傳又見許氏說文

尺牘

爾雅簡謂之畢說文簡牒也牒札也又謂之牘史記匈奴傳漢以尺一牘注木簡也今云尺牘便文爾中庸疏簡牒畢同物而異名又曰策蔡邕書策簡也其制長二尺短者半之其次一長一短兩編下附單執一札謂之爲簡連編諸簡乃名爲策古人書冊字象之矣許慎曰象其札一長一短中有二編之形是也當爲冊矣獨斷又曰凡書字有多有少一行可盡者書之簡簡不容書之方方不容書之冊儀禮不及百名書于方是也古版

也簡方冊三別矣或曰簡隨事記之積多第日月後先登之冊若然則簡者若今檔子草稿矣杜預曰大事書之于冊小事簡牘而已又一說也古人官寺之籍大約如斯士大夫通問簡札之度無文以言之莊周書列禦寇篇不離苞苴竿牘是則當時有餽遺辭語候問也又曰手簡古人親搦筆引紙焉猶曰脫之古人之指端云爾畢郭璞未之詳禮記呻其佔畢鄭公曰畢簡也

盧蒲癸爲齊莊報仇

馮山公筆乘云齊莊公爲崔杼所弑公族盧蒲癸欲報仇知非慶封不能制崔故辱身以事慶封會杼二子成疆與棠姜之子爭宗邑來愬于封癸乘間構之封果使

樊帥甲攻崔氏滅其家猶以慶舍當國逆黨猶存故反  
莊公舊臣盧蒲癸王何二人事之卒殺慶舍逐慶封乃  
戮崔杼之尸改殯莊公于正寢真忠臣也或以其易內  
爲諂不知五倫莫大于君父志在報君則四倫有時而  
輕如東漢之任永避王莽則妻淫不見子溺不救子房  
爲韓報仇則弟死不葬皆此義也

趙高爲趙報仇

古逸史載趙高爲趙之公子抱忠義之性自宮而隱秦  
宮中爲趙報仇張良大索時卽避高家故得免難殆遺  
記以高爲有神仙術子嬰煮之七日不死想以其能亡  
暴秦故史傳多省而賢之歟

義帝有漢高所弑之說

盧行簡病夢青衣人引至一宮殿處方悟前身故是英布項王訴冤于天云高帝陰使布弑義帝嫁名于羽以與問罪之師故天帝召布後身以質之且曰布反漢時馳檄表明其事而漢書史記皆削去之見王九成野錄項羽有始皇之子之說

神仙傳稱始皇與龍女交有孕生兒棄之沙灘項梁收養之長大有勇能自曳其身而飛數步故名之曰羽

漢高祖有母

陸士龍高祖功臣頌曰侯公伏軾皇幄來歸似昭靈夫人乃生歸者按漢書高祖五年已追尊昭靈夫人矣後

十年又書太上皇后崩李奇云太公後妻也

### 戰國貪金好博

左傳小人行賄皆用幣用璧不用金也行賄至戰國而用金蓋貪利至戰國而愈巧矣蘇子得東西周兩國之金而說下水聶政因進百金爲母壽而爲人報仇綦母恢以四十金之贏而贈溫園鄭朝請以三十金復取趙之祭地馮雎請金三十金縱反間以殺宮他秦散三千金而天下之士關頓弱請王資臣萬金以遊韓魏張儀得金千斤而夸鄭袖公孫衍請魏王與百金以敗齊趙之約胡衍取金子蒲以自重于魏樗里子亦得三百金

結下先生以百金而爲衛客說魏王蓋金之爲物不事



承筐便于攜帶故也其他稱博者凡三四見既貪且博風俗之無賴皆春秋時所未有也

有伏羲以前之書

孔穎達疏易經庖犧氏之王天下也引韓詩外傳稱古封太山禪梁甫者萬餘人孔子不能盡識又引管子書稱古之封禪者七十二家夷吾所識十二而已首有無懷氏封太山禪文云云皆刻石紀號字有凋毀故不可識按無懷氏在伏羲前蓋文字在三皇前猶未用之教世至伏羲方用書契以代結繩猶之燧人以前未曾無火但百姓未知熟食耳其說荒謬而新奇姑錄之

史漢字類穿鑿無謂

淳熙樓機編史漢字類樓鑰爲序一東二冬三鍾五支  
六脂七之十三佳十四皆亦可笑也以史籍大篆而云  
書法已壞其書俗惡以叔重說文而云野陋淺薄謬妄  
欺世以史記垓下之圍項韓並未交戰止以楚歌而潰  
去疑無此理

武王未代殷

李穆堂曰武王未嘗代殷也成湯放桀未嘗立夏後蓋  
實取而代之故曰予恐來世以台爲口實若武王伐紂  
紂自焚死卽立武庚爲殷後三監將以輔之非制之也  
武王猶退居于鎬武王旣歿管叔以武庚叛然后誅其  
君立微子以脩三恪故尙書百篇序目祇有微子之命

別無封武庚之文多士之文曰用告商王士是以武庚  
爲商王也又曰非我小國敢弋殷命是仍安侯服也考  
書序稱湯旣黜夏命而周書之序自泰誓攷誓武成凡  
在武王之世者俱無黜殷之文至于大誥然後稱武王  
崩三監叛周公相成王將黜殷其序周官曰成王旣黜  
殷命是殷命至成王始黜也凡封先代之後必別立國  
名故黃帝後曰蓀唐後曰祝虞後曰陳夏後曰杞而武  
庚獨仍殷號以其爲天子也至微子受封則曰宋不曰  
殷矣武庚本名祿父而武庚則其爲天子之號也殷臣  
子自祖已外無以天干爲名者凡以干名爲號者若後  
世之紀元皆天子也惟武庚實爲天子故謝疊山上劉

忠齊丞相書後一段云三監淮夷不叛則武庚必不死  
殷命必不黜殷之位號必不奪微子亦未必以宋代殷  
而降爲上公也意與穆堂同宋韓淵泉論語解亦有此  
說

湯亦禪讓

蘇子由古史以湯爲禪讓蓋本尙書大傳也尙書大傳  
曰湯居中野士民奔湯桀與其屬五百人南徙十里止  
于不齊不齊士民往奔湯桀與五百人徙于魯魯士民  
又往奔湯桀曰國君之有也吾聞海外有人乃與五百  
人俱去其迹頗類禪讓矣黃東發乃云巢不朝商垂六  
百年後始朝周不過因周書有巢伯來朝之語而附會

之

桀無寵妹喜事

史冊皆言桀嬖妹喜按竹書紀年云桀愛岷山二女而棄其元妃妹喜于洛遂以夏亡與正史不合似妹喜是桀之后而寵者非喜也

方正學有後

王元美題方氏復姓記方先生在圍城時以其幼子託上海余氏友遂冒姓余其後人爲南昌司訓先生之鄉人葉君琰刺得其狀爲置田宅要司訓君歸天台奉先生祠又張公燧云當孝孺死時尙書魏公澤謫爲寧海典史悉力保護以故方有遺育謝文肅詩所謂孫枝一

葉是君恩者澤之力也

包孝肅有子

包孝肅奏仁宗臣年七十無子非希後福者似孝肅竟無子矣按本傳公初有子名縉娶崔氏通判潭州卒崔守節不嫁孝肅嘗出其膝在父母家崔密撫其母使謹視之縉死後取縉子歸名曰縉有奏議十五卷

柳子厚子

柳子厚子谷咸通四年與韓昌黎之孫綰同榜見耶光庭兼明書

宓子賤柳下惠不善終

韓非子云宓子賤不鬪而死韓詩外傳柳下惠殺身以

成信此二說並不見于他書

東漢服制重輕不倫

漢書韋義楊仁以兄喪去官孔顯劉焉以師喪去官楚國先賢傳陰嵩以叔父憂去官金石存載漢北海相景君碑云行三年服者八十二人肅宗朝越騎校尉桓郁以母憂乞身詔公卿議皆以郁身爲名儒學者之宗可許之遂聽以侍中行服元初間聽大臣及二千石行三年喪建光元年復禁不許何以三年之喪故吏門生得行于先生長者而人子反不能得之于父母耶又荊州刺史度尚以從父憂去官繁陽令楊君以叔父薨去官郃陽令曹全以同產弟憂去官譙元以弟服去官陳重

以婦喪去官非三年喪何以反聽其越禮而過情也他如贊鳳之故吏衰麻扶杖魏元應之故吏萬里衰裳其時服制重其所輕輕其所重殊不可解

宋法寬嚴不當

人但知宋法過寬而不知亦有過嚴者王繼助食婢百餘在太祖時不發覺韓穉裏鐵杖杖殺無罪人罪止降官王侁爭功陷楊業于死罪止除名儂智高反連破十州其守吏之逃者俱不加罪晁仲約守高郵以酒食餽賊軍范希文猶欲官之登州婦人謀殺其夫至于兩府不能定案赦下復收溫公力爭猶不能決此寬之可笑者也淳化三年詔犯賭博者斬真宗禁銷金飾有寵



妃服之卽度爲道士食貨志民持私酒至京城過五斗者死建隆元年私煮鹽至十斤者死王沂公以買皇后舊宅家未遷而昇土門外罷官歐公以夫人奄其置田被劾罷官蘇子美以貢紙錢一醉終身廢棄熙寧間作詩者杖一百此嚴之可笑者也歐公作江鄰畿墓志稱翰林學士劉筠無後官沒其貲鄰畿爲請立後云云儲同人以爲士大夫無子者官入其家財此宋法也按程迥傳泰興楊大烈有田十頃死而妻存或訟其非正室官遂沒入其貲且追其十年所入之租何刻薄乃爾大抵宋最患貧故預借民間稅至預征六七年後者見真德秀傳

古法太嚴

北魏獻文時官不給祿而受羊一口者死私立學校者  
師死門誅隋文帝法盜一錢者斬唐法食鯉魚者杖一  
百羅願爾雅翼云唐姓李故號鯉曰赤鯉公官齋日遊  
僧舍者有禁禁火日民間以鷄毛插灰焦者死見五雜  
俎後唐長興四年私鹽三斤以上買賣人各杖四十見  
會要宋開寶二年詔父母在而別籍異財者論死太宗  
時江南見販私鹽二斤者死建州民盜魚一斤及市牛  
肉者杖脊送闕張齊賢轉運江南一一條奏自是送罪  
人者減半見通考明法贓至十六兩者剝皮見法傳錄

漢武光武用心之外

漢武受隆慮公主錢千萬許爲其子昭平君贖死罪及公主卒昭平君殺主傅帝以爲法不可壞仍誅之光武視趙孝王病王求赦李子春罪帝不許及孝王薨帝心念孝王不忍乃寬子春之罪一則取其錢而陷人于死一則執法于前而原情于後二帝之賢不賢見矣

### 心學之謬

褚裒之敗于代陂也慕容垂之敗于參合陂也唐太宗之敗于高麗也韓魏公之敗于好水川也皆過其地聞其哭有哀矜悔恨之心焉惟張浚敗于符離殺人三十萬而酣睡如故其子南軒稱家父有心學故能寂然不動以此夸人謬矣

小人詐善

古小人之詐善如公孫宏之脫粟布被趙高之精廉強  
力張湯之家產不過五百金江充之劾公主繫太子家  
令郅都不肯救賈姬殷仲堪之收葬流棺飯落必啖趙  
禹絕知交賓客之請盧杞惡衣惡食放官豕三千席豫  
一生不草書曰細猶不謹況大乎乃奏安祿山公正無  
私余中奏探花郎有傷風化請革除之而卒以賍敗李  
輔國丁謂俱焚香禮佛靜若沙門章惇爲相鄉親無一  
美官褚淵堅拒山陰公主以死自誓秦檜崇儉減堂食  
四十千寶懷貞身爲國善而家徒五斗米

小人貌陋

以貌取人失之子羽然小人貌醜史傳頗多如豎牛深  
目而猥啄孟懿不良而弱行越椒蠶目而豺聲王莽頭  
禿高華身曲侯景脚跛甘卓盼刀梁冀瞋視殷仲堪缺  
唇王叔文莖陋祖珽日盲侯思止口吃盧杞面藍吉溫  
一見而明皇知爲不良鄭注不能遠視稽淵白眼張彥  
澤黃睛諸葛殷胤遍體李元平渺小無鬚王欽若短  
小頸上生疣號稱瘰癧相惟李先有才無貌號錯安頭見  
宋史

武侯用民之寬

蜀大矣而孔明只籍兵二十萬用八萬留四萬替代故  
民愛之蘇秦曰臨淄七萬戶每戶三男子三七二十一

萬兵是盡用之也曹操謂崔琰曰昨按戶籍可得三十萬兵是亦大州也是一州而調三十萬人矣韓魏公則義興溫公爭之公云永不成邊溫公云公將不能自信魏公云何待琦之薄已而公去十年義勇皆沿邊運糧矣

荆公新法之拙

桑孔之平準均輸大抵括收天下之物而買賣之卜式所謂令吏坐市販物也故不刑一人不多一官不加賦而財足惟于國家體制不雅陰侵商販之利制輕重之權故君子猶憎之至于荆公則先結保而後貨或金銀爲抵又貿遷貨物又追呼比徵其時權酒稅太重酒店

不開人不往飲荆公命設妓以招之是數者桑孔未嘗  
爲之然熙寧五年出內藏錢一百八十七萬至九年而  
所得息錢只一百三十萬民怨沸騰又商賈遠遁以避  
指揮之押買故都門稅缺使桑孔有知亦當含笑于地  
下

差役終以溫公爲是

溫公欲復差役東坡力爭欲仍行僱役人皆是東坡而  
非溫公不知僱役便在一時差役利在萬世古人力役  
之征輪流受差役與農不分也役無定人出必輪直故  
無盤踞把持之弊詩曰十五府小史二十朝大夫三十  
侍中郎四十專城居府史胥徒皆由里選同升于朝以

故皆讀書行義之人頗知自重自僱役行而役與農分  
吏與士分略知自愛者必恥爲吏吏與役又復有缺有  
窩世濟其姦葉水心稱後世爲公人世界顧寧人謂後  
世官無封建吏有封建皆差役不行之故也東坡所爭  
不過一時苟且之計惜溫公口吻不能曉切難之

機緣

凡事成敗總有機緣非人力所可強陳餘救張耳使張  
鑒陳澤先嘗秦軍皆歿餘以爲耳殺之也遂至凶終元  
帝在東宮喪愛如宣帝與皇后慮其悲傷遣內監送官  
女五人爲娛其意元帝殊無意于五人者不得已曰此  
中一人可其人乃王政君後幸之生成帝享年八十爵



欽王莽遂移漢祚竇如家在清河故願置籍趙伍中而吏誤置之代籍乃生文帝王仲女已嫁金王孫生女而奪歸納太子宫竟生武帝光武曰吾與隗囂事將不諧使來見殺賜物道亡果以反敗若河西之竇融帝方遣使招之而融使適至遂至全家富貴與國終始王僧辨迎立貞陽大非霸先之意忽壽春悞報齊師大至乃使霸先起兵禦之霸先遂襲京口以致僧辨倉猝無備其悞報者并非霸先之間諜也侯景從壽春起兵攻溧陽慮王質巡江之梗遣人至江口折樹枝報信及至江口而質已內召爲丹陽尹矣童謠云青絲白馬壽陽來其兵所載青絲即朝廷所給之青布也殷仲堪約王恭起

兵正津邏嚴急時故以書納箭幹合鎬漆之恭發書而  
絹文角戾疑爲庾楷所僞遂先期起兵以致大敗或謂  
王晏郊天行逆齊高宗有勅停行徐孝嗣奉旨不行而  
晏勸行不已遂以寃誅裴仙先聞武后盡誅流入故奔  
于胡北庭都護獲而奏之適武后以爲流人 璽矣赦

書方下遂以獲免開元間拜詹事劉幽求流封州崔湜  
使廣州都督周利貞殺之桂州都督王駿匿而不與利  
貞移牒索之牒未至而明皇登極幽求作相朱全忠以  
驛書下龐師古使按誅朱友裕而書誤投于友裕遂以  
獲免梁武帝正月乙卯夢中原混一已而侯景遣丁租  
奉表稱臣定計之日亦正月乙卯也徐知誥不爲諸弟

所容徐溫遣知詢奉表勸吳王稱帝知詰亦草表求領  
洪州節度使此奏旦欲上而溫夕薨知詰遂專吳國之  
政李業欲殺史宏肇聞晉卿知之往史家告之史以他  
故辭不見遂見誅于崇元殿而郭威知其謀遂以獲免  
沈炯爲宋子仙將斬以樹碍而免也袁憲王珪在北齊  
已作高洋之供御四忽然得免以楊愔愛其才而救之  
也呂溫不與王叔文之禍以出使吐蕃故也崔模不與  
崔浩之禍以同宗不睦故也孟后得免金虜以廢居瑤  
華宮宮又被災遷居孟氏故也王涯之從弟沐以方得  
幸于涯而腰斬舒元與之族姪守謙以忽見愔于舒而  
免誅漢黨人死盡無存而亡命之張儉獨存建安時徵

爲衛尉壽八十四其爲藏儉而死者無筭元史行臺幽  
張柔于土室屏赤台施帳寢其上環以甲明日將殺之  
赤台忽暴死柔乃得免宋史劉噐之貶梅州蔡京必欲  
置之死命判官某往殺之判官疾行未至二十里忽暈  
血而亡噐之自知不免已寫遺囑付其奴而竟得免李  
克用平河南歸舍上源館朱全忠醉以酒而襲之克用  
以水沃面方醒騎馬而奔會天大雷雨朱兵不能追乃  
免于難王雲送康王到金過磁州州民發雲之笥得烏  
紗巾雲用以護頭風者民得之以爲金諜也遂誅之而  
畱康王宋太宗斬侯莫利用已降旨又悔乃命乘馬追  
之至新安天雨馬仆換馬追至而利用已死靖康用事

之臣惡李綱不主和議故使救太原明知太原之不可  
救也然綱以在外故得免于北遷宋史陳洪進在南唐  
爲清源節度畱後張漢思病其專大亨將士伏甲害之  
酒乍行地大震屋宇將傾衆悸而走洪進得免後知其  
謀遂囚漢思取其印而歸宋金主亮南侵遼陽已立葛  
王改元大定亮得報驚曰此子福過我我欲平江南改  
元大定取武成一戎衣而天下定之句豫書于冊今葛  
王乃暗合乎出其冊果然葛王卽世宗也至元十一年  
世祖伐宋聞屢勝而喜謂侍臣曰朕兵已到江南宋君  
臣必知畏恐若遣使議和必多增歲幣特勅伯顏按兵  
命禮部尙書廉希賢等講和希賢索兵護送伯顏不可

曰以兵往彼必生疑則和議不成矣希賢堅請乃與五百人至獨松關安撫司張濡大驚以爲兵至卽率衆掩擊盡殺之從此世祖大怒促令進兵而希賢亦以創死見輟耕錄宋曹翰攻江州三年始克太宗嘉其盡節詔克城之日其拒命者盡赦之使人至獨木渡大風數日不得渡風息而渡翰已屠城一日矣唐吏部尙書張嘉福奉使河北逆韋之亂有勅處斬等使赦之使人馬上昏睡遲行一驛止至已斬訖矣金主亮殺謀里也子孫有幼子阿虎里使者不忍見其面以衾覆而縊之適當其臥不得死去被再縊之而海陵赦書到矣遂免後世宗立乃封王唐中宗在房陵崔敬嗣爲刺史傾心奉之

後中宗復辟屢加恩于崔之全姓名者而不知崔死久矣未有鄭絳者作南園記獻韓侂冑韓重放翁之作故將鄭碑理之韓貶鄭乃得免明祖惡馮堅直諫命斬西市既而悔馳使赦之則已誅矣宣德怒李時勉之直諫仁宗以致大漸乃命擒來親鞫殺之已而怒甚又馳勅卽斬西市後使遲至而時勉已擒來矣奏數語帝大悅赦之并還其官奏檜欲收羅遠于門下羅不屈檜大怒必欲殺之而檜死矣高宗曰不愧天子門生遠本紹興辛未狀元也賈似道與元師相拒魯港初戰未見勝負已彼此議定金幣數目明日各退十里以爲信未到五更西風大起元兵旌旗盡行東指宋兵大驚奔潰數十

里元兵因而蹙之以致大敗趙鼎之子汾忤秦檜入獄  
與家人約若得不死進獄飯時以猪笑靨爲饋不數日  
饋滿盤猪笑靨乃大驚以爲家人安慰之意已而知是  
檜死矣劉豫知濟南府金兵來以爲救滄州之兵在城  
上焚香頂禮而迎已而知爲金兵遂將錯就錯而迎之  
金人大喜獨濟南一府不受屠毒崔子文知貢舉見桑  
維翰翰素簡貴曰孔英來矣崔道托孔遂使中式不知  
孔故無行呼其名者薄之也

今人所不爲而古之大賢爲之

陸象山言范文正公丁母憂受晏公之聘掌教河南又  
至京師上書言事皆今人所不爲而古之大賢爲之余



按邵康節宅券用溫公戶名田券用富公戶名此事若在後人必以爲托足權門矣

兩岐語自佳

孔子曰道二仁與不仁而已矣此是正論然亦有兩岐語頗可愛者世說郭林宗與子許文生二人入市文生見物必買子許見物不買或問林宗二人孰是林宗曰子許少欲文生多情明太祖殺人太子救之太祖問袁凱曰朕與太子孰是凱奏陛下法之正太子心之慈五代史李濤薦扈載于李穀穀嫌其命薄濤曰相公有造命之權何必嫌載命薄已而載果亾人兩美之以穀能知人濤能薦士或問殺羊于元圭大師救者是乎不救

者是乎大師曰救者慈悲不救者解脫李林甫問大覺禪師曰肉當食耶不當食耶禪師曰食是相公的祿不食是相公的福唐缺史載中書舍人路羣之高淡給事中盧宏正之富貴而雪中相過二人所服不同所言不同而兩意相忘相好特甚時人兩美之

進一層語亦佳

唐語林有當死者以錢五萬乞宰相張延賞減死爲徒張不可已而許增十萬張允之人疑張貪問其故張曰有錢十萬可以通神彼有罪之人我允其請雖減死罪猶與之徒尙可戒惡若彼以其重賄別通他路或竟全行赦免則彼之爲惡豈不更甚耶葉文莊公家居時有

惡降醢酒馬之公不與校人服其量已而其人以毆殺  
人故將棄市公聞之愀然曰此我陷之死也使當時我  
因其無禮送官究治加以薄責安知小懲大戒不是小  
人之福因我博大度之名犯而不校彼見罵尙書可以  
無罪又何所畏而不毆死人耶宋史胡穎毀淫祠告楊  
允恭曰吾夜坐此察之影響俱無楊曰公以爲無則竟  
無矣又從而察之是又疑其有也尹師魯向友言思退  
官其人曰不如進退兩忘程伊川在舟中遇風不懼曰  
心存誠敬故耳一老翁曰存誠敬不如無心

通財之難

漢書宗室劉德財過百萬乃振第昆當時以爲美談可

見爾時有雖過百萬而不振第昆者鄭當時以好客聞  
至于置驛以通天下之賢者而饋遺人不過陸器食白  
虎通言朋友之道有四而通財不與焉東漢黨人中號  
八厨者言能以財濟人自當在三君八顧中矣

妄詆古人

常笑李飛痛詆元白以爲淫詞褻冶乃名教罪人嚴有  
翼痛詆東坡詩摘其悞處以惹爲非以長桑君爲倉公  
以模金校尉爲模金中郎然千載以來知有元白不知  
有李飛知有東坡不知有嚴有翼蘇子由笑先王據蜀  
非地用孔明非將才不知先王捨蜀之外無地可據所  
用之將關張馬趙並不會用孔明爲將也輟耕錄載俞

文豹責武侯忠于昭烈不忠于漢比之劉盆子龍泉葉氏習學記比之公孫述唐薛能吟詩笑其才薄呂溫作記訾其昧義張南軒亦責諸葛瞻有罪無功不早引退不知諸葛一家與國同休戚者豈可引退陳同甫以武庚爲忠臣孝子是以大禹武王爲逆子亂臣也杜少陵獻西岳賦表有天授陛下元弼克生王阮亭誤司空爲楊釗而不知其時乃郭子儀也他如魏叔子以謝枋得却聘書引夷齊不食周粟是以紂方宋主也不可爲忠臣王崑繩以謝安淝水之役不動聲色因苻堅有許其作吏部尚書之語故爾夷然僥幸成功似此種吹毛之論令人氣憤

六朝習氣語

六朝習氣有不可解者如世說桓宣武稱兩王掾輕妻如生母狗馨周馥家行酒曳裴遐墜地裴顏色不變王夷甫問云何曰直是闇當胡耳王丞相好與人嚙接過胡人彈指云闇闇闇故人大悅殷洪遠詩曰聊復放一曲劉真長笑其語拙曰榆臘亦放可必其鎗鈴耶晉書胡毋謙之見父醉乃厲聲曰彥國老不得爾將使我尻背東壁北史盧思道曉醉于省門其姪賁譏之曰阿父凌晨巍峩韋諛父子相遭其子曰伯陽不肖誠如翁諭亦正值軟抵耳語雖不可解恰是雋永

宋儒習氣語

陳見復先生咫聞錄常摘宋儒習氣語數則爲後學之戒如曰心常惺惺曰活潑潑地曰大驚小怪曰七顛八倒曰翻來覆去曰藏頭亢腦曰堯舜事業一點浮雲過太虛

一時兩徽宗

金史世紀載景宣皇帝廟號徽宗是與宋徽宗同號也  
建元兩世同一號

唐高宗咸亨之後曰上元肅宗乾元之後亦曰上元元  
世祖中統之後曰至元順帝元統之後亦曰至元

易世仍稱舊號

唐昭宗天復四年改元天祐李克用仍稱天復五年而

哀宗亦稱天祐梁太祖崩于乾化二年而明年末帝復稱乾化三年晉高祖建號天福至重貴已改開運矣而後漢高祖仍稱天福至于高祖隱帝俱稱乾祐周祖世宗恭帝俱稱顯德大抵五代之際樂于因循

年號雷同

年號雷同者建武有七中興有六建元有六建平有八天成有六永和有五應天有五太平有五建興有四建初正始俱有四建始天祐乾德光天天興天正俱有三其餘元康元和中元永和貞觀天寶俱有二又指不勝屈矣總因偏霸僭竊之國多故也

天下一歲死罪三人



唐元宗斷天下死罪一歲三人先儒笑其粉飾元史成宗本紀斷天下死罪三人後帝臨朝死罪多者亦不過二三十人雖其粉飾可笑其崇尚好生之意亦可嘉也

### 元輕杖人

韓詩脫身簿尉中始與捶楚辭是唐制簿尉以上不杖也然元稹傳浙西觀察杖安吉令孫解數日死則簿尉以上亦未嘗不受杖也裴伽先姜皎且以三品受杖矣元史趙子昂爲兵部郎中桑哥早到六曹官後至者笞之斷事官引子昂受笞有解之者始免葉李以平章事杖監察御史鄧文原傳轉運司專制有司凡五品以下官皆杖決州縣無如之何張珪以勲臣宏範之子拜中

昔平章事而鐵木迭兒假皇太后旨痛杖之帝不知也  
史弼爲大將軍征爪哇以五千兵渡海二十五萬里得  
寶貨五千萬歸而猶以失亡多杖一十七明代海瑞以  
操江杖御史之演戲者惟刑法志姦兄弟妻姦父妾亦  
止于杖一百七則又太寬矣

頂赤生天

楊文公死時命家人勿哭曰汝等視我氣絕後頂赤者  
生天爲仙腹赤者輪回爲人足赤者墜落爲物此章淵  
贊筆語也後閱佛經原有此說以氣自上升者爲清貴  
以氣下降者爲重濁上升則頭腹熱而足冷下降則頭  
腹冷而足熱同易驗也孫良士野錄云楊文公初生時

身有紫毛一尺白稱武夷君則其升天也必矣

宋人好以怨報德

韓魏公薦王陶而陶劾魏公不押班以爲跋扈張商英薦舒亶而亶劾商英爲壻請托毆公薦林之奇而之奇劾其陰事虞允文薦蕭杲之爲御史杲之曰彼薦我爲我不言事也我偏首劾之韓魏公曰我與希文好如兄弟而其子乃劾我爲豺狼當道是亦不可以已乎何爾時中山狼之多也然史稱之奇爲部使者十二任俱以治辦稱而以叛歐故士論不齒則亦見公道之尙存

書中序事可疑

論語使子路往見之至則行矣子路曰不仕無義一段

向何人說話左氏晉靈公使鉏麇賊趙宣子宣子假寐麇退嘆而言曰一段是誰聽得周書師曠見王子晉自稱曠臣曰汝火色不壽師曠目旣瞋矣何由見子晉之火色而知其不壽耶

已甚受誣

宋名臣好爲已甚之事歐公妻弟薛良孺坐舉人不實被劾已遇赦矣歐公奏不可以臣故使良孺僥倖乞特不原以致良孺切齒有甥女之誣在良孺固不良矣而歐公以好名喪名豈非已甚之故哉

論語考

馮山公作論語考考史記載曾子之年小孔子四十六

歲論語成于曾子之門人而書中載曾子啟手足之事則是書之成蓋離孔子遠矣其說本于柳宗元

### 禽卽獸

古人于禽獸二字不甚分明書稱外作禽荒禽者獵獸之稱易稱卽鹿無虞以從禽也以鹿爲禽周禮大宗伯以禽作六贄有虎皮豹皮亦以獸爲禽賈公彥疏已孕曰獸未孕曰禽直合而爲一矣禽以雌雄名而左氏稱龍一雌死則獸亦可稱雌雄獸以牝牡稱而書稱牝雞之晨則禽亦可稱牝牡

### 帝爲還債

宋時李沆貧時欠人錢三十萬登第後帝爲還之故宋

人詩云新祠民祭祀舊債帝償還

漢大臣權最重

漢大臣權最重田蚡爲太尉可以縛太守中郎將于私第何並爲長陵令可以斷待中王林卿之頭胡建守軍正丞可以斬御史于選馬堂皇上翟義爲南陽都尉可以繫宛令于獄

綬分丙丁記室分格外

東觀記袁安故綬不具丙丁募能爲丙丁文者六安尉雷應龍之賜帛五十疋漢綬上如何有丙丁甲乙之文南史張緒傳王儉爲格外記室又前爲限內記室記室何以有格外限內之分

物極必反

物極必反隋文帝清儉而受制于獨孤后故官中取胡粉一兩竟不可得煬帝繼之官中一日用煙螺五石

女子作官

南史崔慧景傳東陽女子婁遲詐爲丈夫仕至揚州議曹從事後事發明帝驅令還東遲始衣婦人衣而去嘆曰我如此伎乃還作老嫗耶太平廣記張謩事郭汾陽妻七十餘再嫁潘老生二子曰滔曰渠皆人妖也

章惇報施

章惇二弟九孫皆及第王曾富弼無子人以爲姦臣賢臣報施之不公

中三元而后娶

宋馮京字當世自鄉舉禮部以至廷試皆第一時猶未娶張堯佐方負皇后寵擁至其家欲妻以女束以金帶曰此上意也宮女持酒肴來賀出奩具目以夸示之京笑而不視力辭出想其時已爲富弼壻矣王曾亦中三元史不言其娶否

宦官至明而尊極

唐時宦官雖橫然士氣頗伸建州進士葉京常佐宣武軍識監軍之面及第遊街遇監軍一揖而同年譁然鄙之遂至終身不齒觚不觚錄曰百官跪王振者十之五跪劉瑾者十之七親王郡王見張居正用晚生帖居正



見太監馮保用晚生帖至魏忠賢則公然九千歲矣

宦者以淫媒聞

唐宦者高力士李國輔皆有妻開元時宦官吳文妻李氏有碑宋陳源在貶所與妓濫林億年養倡女于別室人皆疑其非宦者俱見本傳

宦官賜諡

宋高宗寵宦者康履爲苗劉所腰斬事平後賜諡榮節又藍安石諡良恪康請諡忠定從古所未有也

不用宦官宋不如元

宋太祖定令民間有鬪童豎者死所以今律文有鬪割火者一條然其時宦者王繼恩李神祐俱領兵爲將故

真宗欲以劉承規爲節度使神宗以李憲監軍不可謂  
貽謀之善也惟元太祖選貴臣子弟給事內庭四大功  
臣世爲之長號曰怯薛故元一代無宦官之禍

牧齋小人心術見于註書

牧齋箋杜句句以小人之心窺君子之腹穿鑿附會令  
人欲嘔如以黃河十月水爲橫蓋之水煎弦續膠爲美  
饌愈疾以問中小兒女爲指張后以洗兵馬收兩京二  
管爲刺肅宗比之商臣楊廣此豈少陵忠君愛國之心  
耶尤可笑者跋元人汪水雲詩客中忽忽又重陽滿酌  
蒲萄當菊觴謝后已明新聖旨謝家田土免輸糧第二  
筵開入九重君王把酒勸三宮駝酥割罷行酥酪又進

椒盤剝燉葱就此二首遂以爲謝后有失節之事按宋  
史理宗謝后寶慶三年冊立垂四十年而度宗嗣位尊  
爲皇太后又十年而后主立尊爲太皇太后已老病不  
能聽政德祐二年宋亡徙越七年而崩壽七十四是至  
燕時已六十七矣寧有劉曜羊后之慮哉水雲又咏宋  
宮人分嫁北匠云君王不重色安肯留金閨則世祖爲  
人可知元史又稱宏吉刺皇后見幼主入朝而不樂爲  
金太后不習水土代奏乞回江南帝雖不許而封幼主  
爲瀛國公則別置邸第完全其眷屬可知水雲詩云昭  
儀別館香雲煖手把詩書授國公是王昭儀亦未入元  
宮也是牧齋又以小人之心度元世祖之腹矣

小青實有其人

施愚山詩話云小青者馮具區之子雲將妾也所謂某夫人者錢唐進士楊廷槐妻也與馮有親而夫人頗知筆墨故相憐愛欲爲作脫身計小青不可夫人從官北去小青貽書與訣皆實錄也陸繁弢有小青焚餘集序西湖志餘小青姓喬有妹嫁武林士人馬文璧

牛車忽貴忽賤

漢書言天子貧不能具鈞駟將相或乘牛車是言牛車之賤也晉太宰王導好乘牛車石崇王濟所乘牛名八百里馭隋牛宏弟射殺其車牛宋書陳顯達傳當時快牛稱陳世子青牛王三郎烏牛呂文顯折角牛是牛車

又貴重矣

痘

小兒痘症古醫書岐黃素問皆無之左傳史記好言人  
狀貌而亦不言及面麻二字李時珍以爲始于馬援征  
武漢蠻染此疾歸名曰虜瘡不名痘也予考之史傳惟  
文苑英華載陳黯幼時面瘡初脫見清源牧咏河陽花  
牧戲之曰漆才而花貌胡不咏之黯應聲曰玳瑁應難  
比斑犀定不加天嫌未端正滿面與粧花似屬痘見文  
字之始

康海救張敷華

人但知李夢陽之死康海救之按明史張敷華傳張敷

華劾劉瑾瑾欲誣湖廣倉穀爛坐以贓罪海過瑾曰吾秦人愛張公如父母公忍相薄耶瑾乃止

### 黑豆

晉惠帝永寧二年黃門侍郎劉景先表奏臣遇太白山隱氏傳濟饑辟穀仙方臣家大小七十餘口更不食別物若不如斯臣一家甘受刑戮其方用大豆五斗淘淨蒸三遍去皮用大麻子三斗浸一宿亦蒸三遍令口開取仁各搗爲末和搗作團如拳大入甑中蒸從戌至子時止寅時出甑午時曬乾爲末乾服之以飽爲度不得食一切物第一頓得七日不饑第二頓得四十九日不饑第三頓三百日不饑第四頓得二千四百日不饑更

不必服永不饑也不問老少但依法服令人強壯容貌  
紅白永不憔悴口渴卽研大麻子湯飲之轉更滋潤臟  
腑若要重喫物用葵子三合研末煎湯冷服下藥如金  
色任喫諸物並無所損前知隨州朱頌教民用之有驗  
序其首尾勒石于漢陽大別山太平興國寺見李時珍  
本草

### 取水

街亭絕汲道而敗

今隴城關  
有街亭泉

永樂闕泉而井破若此類

者志乘博載不具書通典曰飛鳥羣翔其下有水又曰  
尋野馬黃牛蹊有水宜志之北征錄曰尋泉入山遠道  
及砂磧之處乏水者掘一穴容一二石許用濕蓬艾滿

中燒之火猛而閉留一小穴相通四望之但見烟出之處不論遠近掘之得泉脉也石山中卽近石掘之如土山卽草木掘之砂磧擇高處掘之惟深更妙但尋烟出處皆有水一食頃烟未出者再開一穴求之無不得泉脉也

角烟怖虎

角烟怖虎凡人入山持牛羊等角于上風燒之則豺虎山精避不見形蛇虺絕跡井泉陂塘內多生蟲蛙爲害者投馬骨于中則絕跡矣見存研齋文集

古事相類

古事相類者周櫟園作同書十卷桐城方氏作古事比



二十卷似已盡矣予又常戲集之如齊威王朝周趙肅  
侯亦朝周魯仲連不帝秦孔子順亦不入秦蘇武在外  
十九年尚有同行之常惠馬宏亦在外十九年後魏之  
于什門在北燕至二十四年漢周澤彈妻犯齋禁晉劉  
毅亦彈妻犯齋禁魏時苗留犢而晉之羊篇亦留犢前  
漢石奮四子爲二千石號萬石君後漢馮揚八子爲二  
千石亦號萬石君劉業殺父妾嚴武亦殺父妾妻甥女  
者先有漢惠後有孫休而人但傳鄧攸阮修三十始婚  
顏延之亦三十始婚樊英拜妻顧悌亦拜妻殷洪喬投  
人之書張翔亦投許靖之書梁鴻命葬近要離田豫亦  
命葬近西門豹唐明皇賜賀知章鑑湖楚文昭王亦賜

戴偃碧湘湖景陽植表知水沒表裴行儉行軍亦知水  
至朱邑戀桐鄉顏裴亦戀京兆晏子以一桃殺三士南  
朝張纘亦以一杯酒殺吳規父子三人段秀實倒用司  
農印以拒朱泚李崧亦倒用都統印以諭軍卒曹丕不  
信火浣布而蕭叔之譏皇子不識火浣布已見于列子  
左氏國佐拒晉人蕭同叔子之請而國策諒毅亦有平  
原君之母之對郭象竊向秀之註莊而何法善亦竊鄒  
紹之晉中興書唐韋后有天子嫁女皇后娶婦之說而  
漢之張放先有此說避父名不舉進士者唐李賀而陳  
之王泰爲詹事已有此論南史江革除都官尙書還都  
不受贈遺嫌舟輕于西陵峴取石壓舟與陸績之鬱林

石相似魏使李孝伯來聘宋孝武使長史張暢與語而  
帝微服觀之孝伯目帝不止出曰張侯側有人不凡此  
與曹操遺崔琰見客而已提刀相似中書舍人王宏爲  
宋太祖所愛曰卿欲作士人得就王球乃當判耳宏如  
言往球舉扇揮曰若不得爾此與江陵移牀遠客相似  
未歸德趙俊拒爲齊劉豫之辟凡家書文字一切不用  
劉年號但書甲子與淵明相類竇連波妻蘇若蘭作回  
文詩唐上元時有南海女子製鞞圖八花回環凡百  
九十八字見文苑英華客星犯帝座者嚴子陵而桓帝  
時與河南尹鄧萬對博太史亦有此奏請于書尾加一  
點以爲驗者一見之于高歡之于侯景再見于隋文帝

之于蜀王亮以樗蒲納交故爲拙行以輸財者一見于  
范業之于孔熙先再見于宇文述之于楊約再見于高  
斌廉之于裴寂再見于王叔文之于王伾王思政自以  
非宇文舊人乃誓擲梟盧以刀橫膝文帝方止之竟一  
喝而成盧劉信見疑于徐溫亦斂子喝曰苟無二心當  
成渾花亦一投而六子皆赤漢宣時有楚王侍者馮燎  
錦車持節行賞賜于西域諸夷敬信之梁陳時有洗夫  
人亦張錦織行南粵中亦嫁馮氏王績善酒焦革善釀  
餉之亡何革死其妻袁氏善釀又餉之亡何袁亦死白  
樂天詩鄧魴好之亡何魴死唐衢繼魴而好之亡何  
唐亦死魏東阿王見邯鄲淳先傳粉黛禱誦俳優小說

病周忱以地衣獻王振而悅鄭仲以地衣獻秦翰而怒  
歐陽永叔貶官泊采石聞夜呼參政船已而驗黃魯直  
貶官泊石塘間夜呼侍郎船已而竟死宋閩人梁師成  
自言爲蘇軾出子時方禁蘇文師成訴于上曰先臣何  
罪以是蘇文乃出而閩人李彥素與范寥有隙誣其刑  
蘇軾詩文于石指爲十惡二閩之好惡亦大相反晉卞  
望之稱郗公有三反方于事上而好下佞已治身清而  
大修計較好讀書而憎人學問劉賁議王肅有三反方  
于事上而好下佞已性嗜榮貴而不求苟合吝惜財物  
而治身不穢唐人譏李嶠亦有三反之說其事畧同子  
賤治單父彈琴而治巫馬期治單父戴星出入而亦治

晏子儉而稱賢管子奢而稱賢李廣以寬爲名將程不  
識以嚴爲名將趙括之母諫用其子而後周柴克宏之  
母薦用其子南朝陰子春終身不浴而何佟之一日十  
浴王濟好驢鳴孫楚于墓上作之王仁裕惡驢鳴聞必  
擊殺之一云宋范延召也

果報似巧

錢希白以漢末三分乃高祖誅三傑之報謂韓信是曹  
英布是備彭越是權孫氏贅言又以宋末帝昞亡國是  
周顯德二年宋纂之報昞是半顯字德祐是全德字

數若前定不能預知

前漢外戚傳趙飛燕生時父母棄之三日不死乃光漢

室之禍後漢寒朗傳朗生時父母不舉且投荆棘中三日不死乃活楚獄之囚豈非天哉

### 王安石不幸

王安石昏愎之性不過思自立功名而不知其流毒之遠禍宋室甚大罪浮于丁謂王欽若萬倍所謂國家不患于有真小人而患于有偽君子然其遭逢不幸亦若有由于天者章惇蔡京借紹述之說排元祐諸賢勢不得不封安石爲舒王汪伯彥未第時開館于王氏秦檜當國專以王氏新經字說取士吳玠爲蔡氏所薦執政于靖康時故亦崇奉王氏俗謠有十不管之詞如不管砲石管安石不管肅王管舒王是也檜死削爵史彌遠

追復其申王之封小人一線淵源絲毫不亂如此故陳  
公輔以安石學術之謬甚于政事如禁人讀史漢以子  
雲馮道爲得聖人之時虛無荒謬有類王弼何晏攷五  
胡之禍然金人人汴訪韓魏公文潞公之子孫而燒毀  
王安石之書籍又何其是非之明白遠勝于宋之君臣  
歟

宋甯王最貴

今宮殿神廟尊者瓦用甯見宋史郭進傳太祖令有司  
爲進造宅用甯瓦有司奏非親王府不用帝曰我愛進  
豈減兒女耶

宋杞子最貴



宋宰相才坐杌子宋史丁謂傳謂已免相知鄧州矣謂私自夤緣仍許留京次日早朝賜坐左右爲設墩謂曰有旨復平章矣乃更以机進

### 金漆椅

朱髹金漆椅今民間皆用之而宋時極貴惟皇后用之后妃傳劉貴妃與孟后朝太后孟后坐此椅劉亦設此椅左右不服廼呼太后出矣妃起立暗撤之妃再坐而仆妃大怒

### 眼以大長爲貴

身與目古人俱以長爲貴漢書東方朔自夸八尺二寸張蒼父六尺至蒼八尺而貴孫長六尺而失侯東漢書

馮勤父偃嫌其身短爲子伉娶長妻生兄弟皆八尺五寸任顯官北史云七尺之身不如一尺之面一尺之面不如一寸之眼五代史契丹立晉少主指重貴曰此眼大者可也十國春秋錢武肅年八十餘目盲矣聞會孫宏似生問兒眼大小曰眼小武肅嘿然不樂果傳至宏俶而國亡

### 女子男服入陣

金史阿魯真以女子衣男子甲冑與萬奴兵戰

### 今疾病見古書

考今疾病之見于古者鄭康成曰湯半體卽今之半肢風也荀子曰徐偃王目可瞻焉焉鳥之微者卽今之近

視也或云焉乃馬字之訛楊倞註云目不能細視故但  
能瞻馬耳孫叔敖突禿卽今之髮禿也左氏晉侯張如  
廁卽今之膨脹崔令欽教坊記范漢女開元出內庭有  
姿而微羶羶卽今之狐臭也素問淡陰之疾卽今之痰  
飲也周禮春時有疇首疾卽說文之酸瘠頭痛也子雲  
有離胸之疾卽今之怔忡也左傳稱隰豹望視今之望  
羊眼也趙羅疔作而伏今之瘡疾也荀偃生瘍于頭今  
之落頭疽也史記樊荒侯不能爲人今之天閼也韓女  
腰痛淳于意以爲欲男子而不得卽今之相思瘵也論  
衡言周公背僂卽今之背彎也孔子反羽卽今之反唇  
也荀子言傳說如植鰭卽今之枯瘦也周公如斷菑亦

枯瘦之義

六更

楊誠齋詩天上歸來已六更人多不解蓋宋忌五更之  
識故改作六更而不知五更者乃五庚申之謂非夜之  
五更也宋大內五更已絕則梆鼓遍作號曰蝦蟆更亦  
號六更其時禁門開而百官集如外方之攢點今之發  
捕是也周禮三鑿以號戒司馬法曰昏四通爲大鑿夜  
半三通爲晨戒旦明五通爲發煦然則發煦鑿戒與元  
帝摘銅丸中嚴鼓之節張衡賦所用之楚嚴皆今之發  
捕也

白鵝浮水名浮尼

乾隆四十五年阿相國治水河南諸河官築堤已成每見白鵝一羣泛水而行是夜堤必崩乃用鎗砲擊之卒不能除不知何怪又二年讀桂海稗編載明代黃蕭養之亂軍人見白鵝浮水舟必沉溺有識者曰此名浮尼水怪也須黑犬五色穀禳之

### 欠債失官

居官負債漢書孝文三年河陽侯陳信坐不償人責過六月免李晟子基貸回紇錢一萬貫不償貶爲定州司戶參軍

### 九十六歲死節

元史懷遠大將軍王英善用刀號刀王九十六歲毛貴

陷益都不食而死

長一丈九尺

苻堅拂蓋郎夏默長一丈九尺食米五斗肉三十觔劉曜子義孫年十二長七尺見通鑑

狐截人髮

魏書靈徵志太和元年狐截人髮靈太后召而鞭之有蠶蛾喫人百十殊不可解

老年人生子族人作鬧

余親家史少司馬年七十七生子族人登堂大鬧余爲駭然後讀歐公杜杞墓志稱閩俗貧嗇有老而生子者父兄多不舉慮分家產故也杜公上書請立五保俾民

相察有犯者置之法由是生子得免閭人德之生子以  
君姓字名其子按此猶指本家父兄非族人也族人則  
尤悖妄可惡矣

隨園隨筆卷二十八

錢塘袁枚子才

術數類

筭命

古人但用支干月日而不用時呂氏祿命篇李虛中筭法俱不用時亦本洪範篇周禮馮相氏之例耳史記孤虛之術以五行甲子推人休咎徐陵集五行有驛馬之言六甲有官鬼之說小弁詩曰天之生我我辰安在箋辰者六物之吉凶左氏晉侯問伯瑕何謂六物曰歲時日月星辰是也服虔以爲歲星之辰在行于地十二歲而一周蔡邕九惟曰天之生我星宿直食六極之兀獨



遭斯勤此皆今日筭命合五星之始也臨孝恭有祿命  
書陶貞白有三命抄畧鄭富公避申酉祿絕之運而六  
十致政王安石避午上祿敗之運而五十六致仕蘇子  
容避丙戌火庫祿衰而七十致仕蓋或于是說賢者不  
兇呂才駁云始皇法無奴婢而得天下魯莊法當醜陋  
而美貌多才長平坑卒未聞共犯三刑南陽貴士未必  
皆逢六合宋費補之梁溪漫志駁云一時生一人一日  
只生十二人以一歲計之只生四千三百二十人以一  
甲子計之止有五十一萬人千四百八人亦止有五十  
一萬八千四百八人而已今一郡戶口不下數百萬則  
同年同月同日同時多矣又何貴賤貧富之不同哉文

文山贈朱斗南序亦云命只五十一萬而四柱盡矣蓋亦不信推筭之說也樵書云草木瓦礫皆有一定之命有槐子落地出芽日者筭之當如王者受萬人禮拜壽至千年而終後果塑爲佛像香火甚盛至期被焚又洛陽李叟與明太祖同八字帝召見問何業曰老民養蜜蜂十三窠以之度日太祖曰此似我食十三省布政司稅也此亦附會之說余意大撓作甲子原不過標題名數甲乙子丑猶云一二三四也並無意義有何生尅配合之說或曰人亦無姓名今孤之姓某名某則呼之卽應支干水火理亦宜然余駁之曰人靈物也故呼之卽應若草木禽獸派以姓名不能呼之卽應也况支干之

本屬虛無者乎韓昌黎作李虛中墓志極言其推人年  
壽了無一失何以不知已身之壽命而服金石以速死  
也王荆公亦說一篇寫盡貴人好算命之陋宋金華祿  
命論一篇亦言之最詳楊慈湖譏真西山云希元有志  
聖賢而好算命終竟名利之心未斷如何入道宋洪彥  
升奏禁天下士大夫談命佞佛劾郭天信以談命進用  
金世宗大定三年詔三品以上除嫁娶修造安葬外不  
許推筭相命違者革職徒三年其時防禦使曹貴李芳  
俱以妄談命陷罪

### 相

相術最古左氏穀也豈下一語爲相法權輿荀子非之

歷言堯長舜短禹跳湯偏以駁之余嘗笑荀子必謂王  
充所謂天晏賜者夜星燦爛人性文者掌文藻炳亦至  
理也然聖狂吉凶亦多無定舜重瞳項羽亦重瞳李後  
主亦重瞳劉備手垂過膝而興蜀王衍手垂過膝而敗  
北史之劉元進南齊之王元初皆手垂過膝而謀反伏  
誅王莽時甄尋手文有天子二字被誅晉陳瀆女有文  
在其足曰爲天下母四字炙之愈明卒不驗王和女足  
下有七星自稱當母天下卒被誅南史庾翼相貌魁梧  
人稱當爲方伯而卒以餓死褚蘊面角尖危縱理入口  
而衣祿頗豐其有驗而不驗者薄姬在魏王豹宮中許  
負相之當生天子豹心喜背漢反而不知姬投漢宮乃

生文帝唐李錡據潤州有相者言丹陽鄭氏女當生天子錡乃納爲妾不知敗後投于掖庭得幸憲宗竟生宣宗李守正爲河中節度使相者聞其子婦符氏聲曰此天下之母也守正喜遂以反誅而不知符氏乃柴世宗皇后也豈姑布子卿之術又未可以皮相耶

### 陰宅

言葬經者不始于郭璞史記樛里子言後世當有天子之宮夾我墓漢書劉向奏王氏墳在濟南者樹皆文柯連葉上高出屋有立石起柳之象袁安傳書生指某地曰塋後世出三公孫鍾遇三少年乞瓜爲指塋地三國志管輅過母邱儉墳曰白虎街口朱雀悲哭孫堅祖墳

有五色雲曼延數里此言陰宅風水之始也呂才駁之  
司馬溫公駁之最爲明快若伊川之駁葬經言培其木  
根而枝葉自盛此非駁之乃助之也世之父母肥而子  
孫瘦父母壽而子孫夭者多多矣在生之根本尙無補  
于枝葉而况死後乎漢廷尉吳融以人所封之地葬母  
人皆言必滅族而子孫貴盛見後漢書隋文帝曰我家  
墓田若云不吉我不當爲天子若云吉我弟不當戰死  
見隋書宋文潞公穿渠渠司天者言不利時仁宗病後  
改築潞公卽命司天者往乃更言前穿無害恐將來有  
不利則改者受罪故耳見羅氏識遺源乾曜得張說門  
左之地村夫爲之卜塋俚斗爲之書碑而法師知其必

貴見新唐書黃巢李自成之敗俱以掘其祖墳故也乃唐高祖起兵亦被長安留守盡發其祖墳而依然無恙宋明帝惡蕭道成墓有五色雲氣暗遣人以鐵釘長五六尺者釘墓四維以爲壓勝而卒無驗郭子儀祖墳爲魚朝恩所發而子儀七子入壻貴顯朝廷蔡京酷嗜風水葬其父于杭之臨平以錢唐江爲水越之秦望山爲案似乎大吉矣而全家灰滅元史龍岡失火廉希憲謂太常卿曰忠貞曰上都聖上龍飛之地偶爾失火慎勿令妄談者以理音有所更移風水之不驗班班可考人猶惑而不悟可謂愚也

言宅經者不始于王姓史記韓昭侯作高門屈宜曰曰  
昭君不出此門矣此門不時吾所謂時非時日也果高  
門成而韓侯卒自此說興踵其後者漢哀帝疾匈奴來  
朝嫌其從上游來故以太歲厭勝之道館之上林王莽  
以王后年十四有子孫瑞故通子午道從杜陵直絕南  
山徑漢中曹完碑河平元年曹君閔縉紳之途不濟開  
南寺門承望華嶽卒使學者李儒等獲人爵之榮漢書  
來歷傳皇帝數幸乳母王聖舍太子府監邴吉以犯土  
禁不可久御此皆陽宅拘忌之始不知陰陽家西不益  
宅而王充以東家之西卽西家之東漢書司隸校尉趙  
興每入官舍移改穿築故犯妖禁而爵祿益豐朱書孔



靖守吳興項羽不敢與之爭室梁書蕭琛遷憤王廟憤  
王不敢作崇善乎孟嘗君曰文受命于天不受命于戶  
稽康宅無吉凶論曰設三公之宅而命愚民居之必不  
爲三公可知也王符潜夫論曰同一宮也成康居之興  
幽厲居之衰此數言最爲明決或云陽宅不可不慎南  
史載南朝丁奉宅居之者孫皓敗蘇峻敗司馬修之敗  
王僧綽被殺不知孫皓蘇峻雖不居此宅有不敗者乎  
王僧綽殺身成仁雖凶亦吉也

術數在可知不可知之間

術數之學在可知不可知之間爲人謀或驗爲已謀便  
不驗且一有私已之心便爲造物所忌漢昭帝時睦孟

奏公孫病已當立言驗而已以妖言誅哀帝時夏賀良  
欽陳聖劉太平皇帝之識而以不道誅後言亦驗張竦  
以反支日不行爲賊所殺王匡以六甲窮日不出兵爲  
鄧禹所敗東漢郎顗奏國家地震鮮卑當入寇所言驗  
而已不肯與孫禮交乃爲所殺劉歆以名應圖讖故叛  
莽不知劉秀乃光武欲待太白星出方起兵應漢而不  
知事洩死後太白星果出魏王凌以熒惑守南斗當有  
暴貴者母邱儉見彗星竟天以爲已祥遂皆舉兵不知  
皆應在司馬氏與已無與也晉孟觀以紫微不動故爲  
趙王倫守河北不應齊王冏之兵致夷三族不知紫微  
所應乃元帝非趙王也郭騰號稱聖人吕光奉爲神師

起兵時以爲滅姚者晉故奔晉被殺不知滅姚者晉臣  
劉裕也索靖知姑城城南石地當起宮殿而不知已之  
被壓以卒魏劉靈助反于固城占云三月之末我必入  
定州爾朱氏不久當滅及事敗伏誅函首入定州果三  
月末而爾朱氏亦竟滅孔熙先觀天文知宋文帝必不  
善終故謀反伏誅後文帝乃爲元凶所弑知江州當出  
天子故立彭城王義恭不知應在武陵王駿非彭城也  
梁武與張宏策談天文歷歷皆驗自知天命在已不知  
後有臺城之厄又嘗登北顧亭謂江右有反氣骨肉爲  
戎首然卒納侯景又任用臨賀王何耶劉養正以帝星  
在吳頭楚尾故勸宸濠反不知應在嘉靖也梁武陵王

紀起兵蜀星士說紀曰官若東下當用申年太白出西  
從之爲利申歲發蜀酉年入荆不可失也發蜀之歲太  
白在西及至明年則已東出紀乃敗誅魏師圍江陵城  
時梁元帝登鳳皇閣嘆曰客星入翼軫今必敗矣已而  
果然其他如郭璞之銜刀被髮慕容紹宗之自投水中  
斛律羨之鎖頸出城顏惡頭之自知厄在彭城王子年  
之自知爲人還債皆前知厭勝而卒無救善乎三國志  
趙達精術數而不肯傳其書曰先人挾此術圖作帝王  
師乃三世不過太史耶所謂藝成而下也昌黎臨終遺  
命曰陰陽吉凶一無污我真乃達人

鬼神弄人

鬼神弄人如武帝時之神君孫權時之王表皆明載史冊卒無補于國家其戲弄人而誘之敗者東漢張滿讀識文應已名姓故謀叛臨誅乃曰識文悞我張豐得石璽大喜自稱無上大將軍謀反事敗臨誅猶指肘後璽不忍決捨晉天福年張遇賢見太白山神自稱崔浩爲之謀主破江淮數州有問必應忽神去問之不應兵敗伏誅唐敬宗時染坊供人張詔卜卦當升殿坐與火伴蘇元明對食乃作亂竟殺詔者果升清思殿與元明同食食畢捕者至事敗伏誅宋吳曦見月中人舉鞭相揖月中人荅之以爲大貴遂謀反以誅明季崑山徐某作亂鄰人不從乃卜于神以關帝廟鐵刀置水浮則起兵

刀重百二十斤以爲必沉也投之竟浮水面衆咸驚駭頃刻從者萬人亡何事敗一村皆誅

夢亦難信

不特陰陽術數不可信也卽夢寐之事一信之便爲鬼神所弄如叔孫豹夢天厭已而得豎牛之禍趙武靈王夢處女鼓琴而歌乃納吳娃卒至奪嫡餓死張敬兒因妻夢全體熱而謀反被誅梁武帝夢中原混一而次日納侯景之降竟以亡國漢武帝夢木人欲擊帝而枉殺皇后太子徐知誥夢吞金丹而次日方士獻藥服之以殂杭州沈濟之夢神謂曰汝後園有藏金一甕可往掘之沈問何處神曰但見有草繩縛福字錢者是也次日

往園果見錢繩福字宛然大喜掘至丈許杳無所得以  
此竟成狂易之疾宋史臧丙傳丙舊名愚夢父召丙立  
于庭指天曰老人星見矣仰視之果黃明而大喜以壽  
星出丙入丁故改名丙字夢壽及其死也壽止五十一  
柘城李少司空季子繼遷成進士司空及太夫人歿後  
繼遷患危疾夢太夫人教服參因以告醫醫曰參與病  
相犯不可服是夜復夢太夫人云醫言不可聽汝求生  
非參不可我有參幾許在某處可用採之果得服之夜  
半發狂死陸射山徵君夢尊人孝廉公云吾窀穸內爲  
水所浸甚苦臯亭山頂有地一區係某姓求售盡往買  
而移葬吾神所依也訪之果合因以重值得之及改葬

舊穴了無水且瘴氣如蒸悔已無及遷葬後徵君曰就  
困頓子孫流離

### 天文難憑

越得歲而吳伐之吳卒亡于越此左氏語也然慕容超  
之亡歲星在齊而劉裕滅之卒亦無恙同一五星聚箕  
而齊桓以霸祿山以亡同一星孛大角而始皇以帝項  
羽以敗譙周稱災或守歲魏文帝殂二國無恙故以魏  
爲正統然天官書月犯心大星王者應之三國時有此  
變而昭烈祖吳魏又無恙梁天監中雷書太陽門日紹  
宗梁王惟武王一時人以爲武陵王紀必紹帝位矣後  
武陵王竟不終星隕相州人疑韓魏公當之已而魏公



無恙乃庸相王貽永藁貽永亦判相州事欽宗內禪  
昚星復明已而北遷崩于沙漠

草木無知

宋將亡文文山見真州樹紋生天下趙三字心大喜以  
爲是蟲食葉公孫疇已立之徵卒不應見文山集

凡信時日小數者無不破敗

王莽性好時日小數卒以破敗事在傳中晉廢太子通  
性拘小忌不許修墻動瓦卒被藥杵椎殺桓元臨敗召  
諸道人推筭爲屢勝法卒伏誅宋明帝尤信鬼神多忌  
諱移牀治壁先祭土神改驪字爲邊爪呼白門爲宣陽  
門年三十四而崩以昭明太子之賢而以母丁貴嬪葬

地有不利長子之言爲厭勝法埋蠟鷄于墓側致爲武帝猜疑慚懼而薨善乎元人就日錄曰大凡見理明之人五行神鬼皆不能拘陶淵明亦曰癡人前不說夢達人前不說命

邪不勝正神鬼生于人心

風俗通載李君神石賢士鮑君神之類皆起于一人之誣罔而從者若狂卒之神亦烏有五行志王周南家鼠白晝人立曰王周南某日死周南坦然不應亡何鼠自顛仆而亡晝曼錄范文正公修史載某隱隱夜夢某怒云不改史將禍爾子公不改果長子純禮亡夜又夢某詈云再不改將禍爾次子果次子純仁病全家泣請公

終不改已而純仁病愈此邪不勝正也東坡志林宋將  
石普醉怒羹矢調命斬厨人其夫人憐而縱之爲報斬  
訖亡何普患病見此厨瀝血持頭立牀前索命夫人向  
普問說告以並未斬也普不信愈哀號乞命夫人不得  
已遣人四路覓厨者來普一見而病愈淨法禪師夜踏  
菜葉誤以爲踏死蝦蟇心中耿耿輪回時遂入惡道此  
鬼神生于人心也

灾祥不一

古人四靈爲畜麟鳳皆祥瑞之物而徐楚金說文繫傳  
言麟出春秋非瑞也小鳥生大鳥猶桀之變大殷爲小  
殷禹錫元圭爲寶而張武錫金錢爲辱也晉中興書曰

甘露降王者恩及耆老則松柏受之能用賢人則蘭薰  
受之是甘露瑞也然汝南先賢傳都尉廳前有甘露功  
曹鄭敬曰此非甘露乃青木汁也陳祥明中松林冬月  
出甘醴人呼爲爵錫有則草木必枯是甘露非瑞矣京  
房易傳曰河水清天下平鮑照有河清頌是河清瑞也  
然漢延熹八年黃河清襄楷奏爲災天子宜修省唐五  
行志亦然曰知錄歷數漢唐以來河清爲革代之兆是  
河清非瑞也光武與嚴子陵卧太史奏客星犯帝座佳  
話也桓帝與白衣人捕博太史亦奏客星犯帝座非佳  
話也天官書本以客星爲災星天瑞五色雲人瑞鄭仁  
表唐以爲祥韓魏公驢唱太史奏五色雲見宋以爲祥

天文志云五色雲妖雲也見則年穀不登御覽引宋書  
景平元年有雲五色而徐羨之等廢少主則又以爲災  
矣梁書張后家昌蒲生花武帝以爲大瑞齊永元中御  
刀黃文濟家亦昌蒲生花隨卽被誅則又以爲災矣